

կան տապանատան արևելյան կողմի տաճարի ավերակները Սանահնի վանքի հիմնարկությունից առաջ գոյություն ունեցող հնագույն եկեղեցու մնացորդները չեն, ինչպես ենթադրել է Ղրիմեցին, այլ պատկանում են 11—13-րդ դարերում կառուցված մի անհայտ եկեղեցու, որի կառուցման մասին ոչ ար-

ձանագրություն ունենք և ոչ էլ մատենագրական տեղեկություններ:

Սակայն, հնագույն մնացորդների հետքեր պահպանվել են Ամենափրկիչ եկեղեցու արևելյան սեղանի հարավակողմյան աստիճանների կողքին, եկեղեցու մույթերի մեջ, որտեղ երևում են գոյություն ունեցող եկե-



Նկ. 1. Սանահնի վանքի ընդհանուր տեսարանը հր աե կողմից:

ղեցու հետ որևէ առնչություն չունեցող հնագույն մի տաճարի, հավանաբար, դարձյալ որմնամույթի խարսխի քարը՝ պայտաձև վարդերի շարքով, որոնց կենտրոնում ուռուցիկ գնդակներ են դրված: Այդ միանգամայն ուշագրավ քարն իր բուն դիրքում է թե ոչ, այժմ դժվար է պարզել առանց ստուգումների, բայց ակներև է, որ այստեղ գոյություն է ունեցել մի շատ հին, հավանաբար 4—5-րդ դարերում կառուցված տաճար, որի ավերակների վրա հետագայում կառուցել են այժմ գոյություն ունեցող Ամենափրկիչ եկեղեցին (նկ. № 2):

Քաջբերունին, հենվելով ավանդության վրա, հայտարարում է, որ 4-րդ դարի սկզբին մի փոքրիկ խորան է շինվել Սանահնում¹:

Այդ մասին ոչ միայն հնագույն մատենագիրները, այլև ավելի ուշ ժամանակների՝ 10—17-րդ դդ. հեղինակները ոչինչ չեն հիշատակում, թեև ընդարձակորեն տեղեկություններ են տալիս Սանահնի մասին:

Այստեղ անհրաժեշտ է նշել, որ Սանահնի ճարտարապետական մանրազնին քննությունը դեռ չի կատարվել և ոչ էլ պեղմամբ ուսումնասիրվել են տաճարներն ու նրանց ավերակների տեղ-տեղ երևացող հիմնապատերը, որպեսզի վերջնական խոսք ասվիր հնագույն շենքերի հիմնարկության ժամանակի մասին, բայց վերևում մեջ բերած հնագույն մնացորդները ցույց են տալիս, որ այնտեղ եղել է մի հնագույն տաճար, որի տեղում հետագայում հիմնարկվել է Սանահնի հռչակավոր վանքը²:

¹ Ք ա ջ բ եր ու ն ի, ճանապարհորդական հիշատակարան, «Արձագանք», 1884, էջ 629:

² Սանահնի ճարտարապետական քննությունը կատարել է ճարտ. Հովհաննես Ղալփախյանը, բայց նրա ուսումնասիրությունը դեռևս չի հրատարակված և մեզ ծանոթ չէ: